

## SAMÞYKKT

### um fiðurfé í Djúpavogshreppi utan skipulagðra landbúnaðarsvæða.

#### 1. gr.

##### *Gildissvið og markmið.*

Samþykkt þessi gildir um fiðurfé í Djúpavogshreppi á svæðum öðrum en skipulögðum landbúnaðarsvæðum og skráðum lögbýlum.

Samþykktin er sett til að tryggja öryggi, hollustuhætti, góða umgengni og fullnægjandi mengunarvarnir vegna fiðurfjár í Djúpavogshreppi.

Fiðurfé er samkvæmt þessari samþykkt allir fuglar af hænsna- og andaætt. Jafnframt nær samþykktin yfir dúfnahald.

Matvælastofnun fer með mál er varða lög um velferð dýra samkvæmt lögum nr. 55/2013, um velferð dýra.

#### 2. gr.

##### *Leyfisveitingar og skilyrði.*

Hald fiðurfjár, þ.e. fuglahald, er háð leyfi skipulags-, framkvæmda- og umhverfisnefndar Djúpavogshrepps. Áður en fuglahald hefst er skylt að sækja um leyfi hjá Djúpavogshreppi. Telji skipulags-, framkvæmda- og umhverfisnefnd að skilyrðum til að halda fiðurfé sé fullnægt getur hún veitt lögráða einstaklingi eða lögaðila leyfi til að halda ákveðinn fjölda fugla á lögheimili sínu til tiltekins tíma.

Leyfilegt er að halda hænur og endur að hámarki alls tíu fugla á sömu lóð. Hvað varðar dúfnahald er leyfilegt að halda að hámarki sex dúfur á sömu lóð. Óheimilt er að halda hana og gæsir.

Skilyrði leyfisveitinga eru:

- að tilskilin leyfi byggingar- og skipulagsyfirvalda liggja fyrir nema að skilyrði í g-lið í 2.3.5. gr. í byggingarreglugerð nr. 112/2012 sé uppfyllt,
- að umsækjandi hafi ekki gerst brotlegur við lög nr. 55/2013, um velferð dýra,
- að fyrir liggja samþykki sameigenda eða leigjanda ef um fjöleignarhús er að ræða. Sama á við ef um er að ræða jörð eða fasteign í óskiptri sameign. Sé umsækjandi leigjandi skal fylgja samþykki leigusala,
- að fyrir liggja samþykki íbúa nærliggjandi húseigna í hið minnsta 100 metra radius frá þeim stað sem halda á fiðurfé,
- að gengið sé úr skugga að hæsnahald eða annað fuglahald hafi ekki verið sérstaklega bannað eða þinglýstar kvaðir séu á húseignum sem koma í veg fyrir að þar sé haldið fiðurfé.

#### 3. gr.

##### *Aðbúnaður.*

Um almennan aðbúnað og velferð dýra gilda ákvæði laga nr. 55/2013, um velferð dýra, og reglugerða sem settar eru samkvæmt þeim.

Á lóðum þar sem veitt er leyfi til þess að vera með fiðurfé þarf að vera hæfilega stór kofi sem rúmar þann fjölda af fuglum sem leyfi er veitt fyrir.

Í kringum fuglakofa skal vera fuglahelt gerði, hæfilega stórt fyrir útiveru fuglanna og sem fullnægir náttúrulegum þörfum þeirra.

Eiganda ber að sjá til þess að fuglahaldið laði ekki að meindýr.

Fuglakofi og gerði skulu vera vel innan lóðarmarka viðkomandi lóðar, að lágmarki 3 m. Kofi skal vera meindýraheldur og fôður skal geyma í meindýraheldum ílátum. Til að fyrirbyggja að mýs komist í fôður skulu ílát vera í a.m.k. 35 sm hæð frá jörðu og vera u.þ.b. 60 sm djúp.

Aðgengi að vatns- og/eða sandbaði skal vera til staðar fyrir fuglana.

#### 4. gr.

##### *Þrif.*

Þrifa skal kofa að lágmarki vikulega.

Skít skal fjarlægja við daglega umhirðu og hann má ekki safnast upp. Hæsnaskít skal farga eða nýta á löglegan hátt. Þegar mokað er úr húsum skal koma hæsnaskít fyrir í lokuðum umbúðum þannig að hann valdi ekki lyktarmengun. Þegar hæsnaskítur er nýttur sem áburður skal plægja hann niður þannig að hann liggja ekki á yfirborðinu. Ef ekki er unnt að nýta skít skal flytja hann í lokuðum umbúðum á móttökustöð fyrir lífrænan úrgang.

## 5. gr.

*Myrkvun.*

Til að koma í veg fyrir ónæði vegna hávaða frá fuglunum ber að hafa myrkur hjá þeim frá kl. 21.00 til kl. 7.00 alla daga.

## 6. gr.

*Ábyrgð á lausagöngu.*

Lausaganga fiðurfjár er með öllu óheimil og ber eigandi fulla vörsluskyldu.

Eigandi fiðurfjár er að öllu leyti ábyrgur fyrir sínum fuglum og ber að koma í veg fyrir að dýrin valdi ónæði í umhverfinu, svo sem vegna hávaða, ólyktar og hvers konar óþrifnaðar.

## 7. gr.

*Handsömun.*

Sleppi fugl frá eiganda eða umráðamanni, skal viðkomandi tafarlaust gera ráðstafanir til að handsama fuglinn. Fiðurfé sem er laust, utan girðinga, skal færa í dýrageymslu á vegum sveitarfélagsins. Ef fugla er ekki vitjað innan tveggja sólarhringa frá handsömun er heimilt að ráðstafa þeim til nýs eiganda eða selja fyrir áföllnum kostnaði. Að öðrum kosti skulu fuglar aflífaðir.

## 8. gr.

*Kostnaður við handsömun.*

Hafi fugl verið handsamaður er óheimilt að afhenda hann fyrr en að lokinni greiðslu áfallins kostnaðar og framvísun gilds leyfis til að halda fiðurfé. Sé eigandi ekki með leyfi til að halda fiðurfé skal afla leyfis og greiða fyrir það áður en afhending á sér stað.

Kostnaður við handsömun, geymslu eða aflifun fiðurfjár skal að fullu greiddur af eiganda þess.

## 9. gr.

*Sjúkdómar.*

Komi upp sjúkdómar eða smithætta sem að mati sóttvarnarlæknis og yfirdýralæknis geta skapað hættu fyrir heilbrigði manna, ber að hætta fuglahaldi tafarlaust og farga fuglum í samráði við heilbrigðisnefnd.

## 10. gr.

*Eftirlit.*

Eftirlit með því að ákvæðum samþykktar þessarar sé framfylgt er í höndum heilbrigðisnefndar Austurlands samkvæmt lögum nr. 7/1998, um hollustuhætti og mengunarvarnir.

Djúpavogshreppur fer með framkvæmd samþykktarinnar í umboði heilbrigðisnefndar. Djúpavogshreppur getur ráðið dýraeftirlitsmenn eða falið starfsmönnum sínum hlutverk dýraeftirlitsmanna. Dýraeftirlitsmenn starfa undir eftirliti og á ábyrgð heilbrigðisnefndar. Dýraeftirlitsmenn geta leitað aðstoðar heilbrigðisnefndar og lögreglu yfirvalda við að fjarlægja óleyfisdyr þegar þörf krefur, t.d. vegna almannahagsmuna, dýravelferðar eða heilbrigðis- og öryggissjónarmiða.

## 11. gr.

*Afturköllun leyfis.*

Sveitarstjórn getur afturkallað leyfi til fuglahalds samkvæmt samþykkt þessari ef fuglahaldið veldur ónæði í umhverfinu, leyfishafi hefur gerst brotlegur við lög nr. 55/2013, um velferð dýra, eða brotið er gegn samþykkt þessari.

12. gr.

*Þvingunarúrræði.*

Um þvingunarúrræði og viðurlög við brotum gegn ákvæðum samþykktar þessarar fer samkvæmt XVII. og XIX. kafla laga nr. 7/1998, um hollustuhætti og mengunarvarnir.

13. gr.

*Gjaldtaka.*

Sveitarstjórn er heimilt að setja gjaldskrá í samræmi við 59. gr. laga nr. 7/1998, um hollustuhætti og mengunarvarnir, til að standa straum af kostnaði vegna framfylgdar á samþykkt þessari. Í gjaldskrá eru upplýsingar um leyfis- og eftirlitsgjöld og þann kostnað sem leyfishafi skal bera og kann að hljóttast af handsömun, fóðrun og hýsingu fuglanna.

Gjöld vegna aðkomu heilbrigðisnefndar greiðast samkvæmt gjaldskrá Heilbrigðiseftirlits Austurlands.

14. gr.

*Úrskurðarnefnd.*

Um kæruheimildir til úrskurðarnefndar umhverfis- og auðlindamála vegna samþykktar þessarar fer skv. 65. gr. laga nr. 7/1998, um hollustuhætti og mengunarvarnir.

15. gr.

*Staðfesting og gildistaka.*

Samþykkt þessi staðfestist hér með skv. 2. mgr. 59. gr. laga nr. 7/1998, um hollustuhætti og mengunarvarnir, til þess að öðlast þegar gildi.

*Umhverfis- og auðlindaráðuneytinu, 11. janúar 2018.*

F. h. r.

**Sigurbjörg Sæmundsdóttir.**

*Laufey Helga Guðmundsdóttir.*